

KWA NINI DHAMBI NA MATESO VILIRUHUSIWA?

Kwa watu wengi chanzo cha dhambi na sababu ya kuwako kwake ni chimbuko la utata mkubwa. Wanayaona matendo mabaya, pamoja na matokeo yake ya kutisha ya misiba na uharibifu, kisha wanajiuliza kwa jinsi gani [mambo] hayo yote yanaweza kuwako chini ya mamlaka ya yule Mmoja ambaye ana hekima yote, uwezo wote, na upendo wote. Hapa kuna siri ambayo maelezo yake hawayapati. Na katika hali yao ya kutokuwa na hakika na mashaka yao wanapofushwa macho wasiweze kuziona kweli zilizofunuliwa wazi katika Neno la Mungu, ambazo ni za muhimu kwa wokovu wetu. Kuna wale ambao, katika kutafuta habari zinazohusu kuwako kwa dhambi, wanajaribu kufanya utafiti wao katika kile ambacho Mungu hajakifunua; kwa hiyo hawapati suluhisho lo lote kwa matatizo yao; na [watu] kama hao wanaoongozwa na mwelekeo wao wa kuona mashaka na kubisha hulishikilia jambo hilo [la kutopata suluhisho] kama ndio udhuru wao wa kuyakataa maneno ya Maandiko Matakatifu. Walakini, wengine wanashindwa kuwa na ufahamu wa kutosha kuhusu tatizo hili kubwa la uovu, kwa sababu mapokeo na tafsiri potofu zimetia giza mafundisho ya Biblia kuhusu tabia ya Mungu ilivyo, asili [msingi] ya Serikali Yake, na kanuni zake za kuishughulikia dhambi.

Ni jambo lisilowezekana kueleza chanzo cha dhambi kiasi cha kuweza kutoa sababu ya kuwako kwake. Lakini kiasi cha kutosheleza kwa mambo yote mawili kinaweza kufahamika kuhusu chanzo na mwisho wa dhambi pamoja na kudhihirisha kikamilifu HAKI na FADHILI za Mungu katika kushughulika kwake kote na uovu huo. Hakuna jambo linalofundishwa kwa wazi zaidi katika Maandiko kama lile la kwamba Mungu kwa vyo vyote vile HAHUSIKI NA KUIINGIA KWA DHAMBI; kwamba Mungu hakuiondoa neema yake kiholela, kwamba hapakuwa na kasoro yo yote katika Serikali ya Mungu, ambayo ingesababisha kuwapo mwanya wa kuinuka maasi hayo. Dhambi ni kitu kilichojiingiza chenyewe, ambacho kuwako kwake hakuna sababu inayoweza kutolewa. Ni kitu cha ajabu, kisichokuwa na maelezo yo yote; KUITOLEA UDHURU NI KUITETEA. Kama udhuru ungaliweza kupatikana kwa ajili yake, ama sababu ingaliweza kutolewa kwa kuwako kwake, basi, ingekoma kuwa dhambi. Maana yetu ya dhambi ni ile tu iliyotolewa katika Neno la Mungu; [dhambi] ni "UVUNJAJI WA SHERIA," [I Yohana 3:4, AJKK], ni utendaji wa kanuni ile inayoipiga vita Sheria kuu ya upendo [Amri Kumi] ambayo ndiyo msingi wa Serikali ya Mungu.

Kabla ya dhambi kuingia kulikuwa na amani na furaha katika malimwengu yote. Vyote vilikuwa katika mwafaka mkamilifu na mapenzi ya Muumbaji. Upendo wao kwa Mungu ulikuwa umefikia kipeo chake, na upendo kwa kila mmoja ulikuwa hauna ubaguzi. Kristo, ambaye ni Neno, Mwana wa pekee wa Mungu, alikuwa UMOJA na Baba yake wa milele, ----- katika asili, tabia, na makusudi, ----- kiumbe wa pekee katika malimwengu yote aliyeweza kuingia katika mashauri na makusudi yote ya Mungu. Kwa njia ya Kristo, Baba aliumba viumbe vyote vya mbinguni. "Kwa kuwa katika Yeye vitu vyote viliumbwa, vilivyo mbinguni... ikiwa ni viti vya enzi, au usultani, au enzi, au mamlaka" (Wakolosai 1:16); na kwa Kristo, kama vile kwa Baba Yake, mbingu yote ilionyeshwa utii wake.

Sheria ya upendo [Amri Kumi] ikiwa ndiyo msingi wa Serikali ya Mungu, kuafikiana kabisa na kanuni zake za haki lilikuwa ndilo tegemeo la furaha ya viumbe vyote vilivyoyumbwa. Mungu anataka huduma ya upendo kutoka kwa viumbe vyake vyote ----- ibada ile inayotokana na kuithamini kwa akili tabia yake. Hana furaha na utii wa kujilazimisha, tena huwapa wote uhuru wa kufanya wapendavyo, ili waweze kumpa huduma ya hiari.

LUSIFA, WA KWANZA MIONGONI MWA MAKERUBI

Lakini alikuwako mmoja aliyechagua kuutumia uhuru wake vibaya. Dhambi ilianzishwa na yule ambaye, akiwa wa pili toka kwa Kristo, alikuwa amepewa heshima kubwa sana, naye alikuwa amesimama mahali pa juu sana pa uwezo na utukufu miongoni mwa wakazi wote wa mbinguni. Kabla ya anguko lake, Lusifa alikuwa ni Kerubi afunikaye wa kwanza, mtakatifu, na asiye na waa. "BWANA Mungu asema hivi; Wewe wakitia muhuri kipimo, umejaa hekima, na

ukamilifu wa uzuri. Ulikuwa ndani ya Edeni, bustani ya Mungu; kila jiwe la thamani lilikuwa kifuniko chako." "Wewe ulikuwa kerubi mwenye kutiwa mafuta afunikaye; nami nalikuweka hata ukawa juu ya mlima mtakatifu wa Mungu, umetembea huko na huko kati ya mawe ya moto. Ulikuwa MKAMILIFU katika njia zako tangu siku ile ulipoumbwa, hata UOVU ulipoonekana NDANI yako." Ezekeieli 28:12-15.

Lusifa angaliweza kubakia katika upendeleo wa Mungu, akiwa anapendwa na kuheshimiwa na jeshi lote la malaika, akitumia uwezo wake mkuu kuwaletea furaha wengine na kumtukuzwa Muumbaji wake. Lakini, asema nabii huyu, "Moyo wako uliinuka kwa sababu ya uzuri wako; umeiharibu hekima yako kwa sababu ya mwangaza wako." Fungu la 17. Kidogo kidogo, Lusifa akaanza kuingiwa na tamaa ya kujiinua mwenyewe. "Umeweka moyo wako kama moyo wa Mungu." "Nawe ulisema... Nitakiinua kiti changu juu kuliko nyota za Mungu; Nami nitaketi juu ya mlima wa mkutano.... Nitapaa kupita vimo vya mawingu, Nitafanana na Yeye Aliye juu." Fungu la 6; Isaya 14:13,14. Badala ya yeye kumfanya Mungu aonekane kuwa ndiye Mkuu kuliko wote katika mapenzi na utiifu wa viumbe vyake, ilikuwa ni jitihada yake Lusifa kuwashawishi watoe huduma yao pamoja na utii wao kwake yeye mwenyewe. Naye akiwa anatamani sana heshima ile ambayo Baba wa milele alikuwa amempa Mwanawe, mkuu huyo wa malaika akataka sana kujipatia mamlaka hayo ambayo ilikuwa ni haki ya Kristo peke yake kuyatumia.

Mbingu yote ilikuwa imefurahia kuakisi utukufu wa Muumbaji wao na kuzitangaza sifa zake. Naye Mungu alipoheshimiwa hivyo, kukawa na amani na furaha kote. Lakini sauti ya kutopatana sasa ikaharibu mwafaka wote uliokuwako mbinguni. Kuitumikia na kuiinua juu nafsi, kinyume na mpango wa Muumbaji, kukaamsha hisia za uovu mioyoni mwa wale ambao walikuwa wameupa utukufu wa Mungu kipaumbele. Mabaraza ya mbinguni yakamsihi Lusifa. Mwana wa Mungu akaonyesha mbele yake [Lusifa] ukuu,

fadhili, na haki ya Muumbaji, pamoja na utakatifu na tabia ya Sheria yake isiyobadilika. Mungu Mwenyewe ndiye aliyeweke utaratibu wa mbinguni; na kule kujitenga nao, Lusifa angekuwa anamvunjia heshima Muumbaji wake, na kujiletea maangamizi mwenyewe. Lakini onyo hilo, lililotolewa kwa upendo na rehema isiyokuwa na kifani, likaamsha tu roho ya upinzani [ndani yake]. Lusifa akauachilia wivu wake juu ya Kristo kuzidi sana, naye akazidi kuwa shupavu zaidi.

Kiburi kutokana na uzuri wake kikachochea tamaa ya kutaka ukuu kuliko wote. Heshima kuu alizopewa Lusifa hazikuthaminiwa kama ni karama ya Mungu wala hazikumfanya awe na shukrani yo yote kwa Muumbaji wake. Akajitukuza kwa mwangaza wake na kujiinua, na kutaka sana kuwa sawa na Mungu. Alipendwa sana na kuheshimiwa na jeshi lote la mbinguni. Malaika walifurahia kutekeleza maagizo yake, naye alipewa hekima na utukufu zaidi ya wote. Hata hivyo, Mwana wa Mungu alikuwa ndiye Mfalme wa mbinguni aliyetambulikana, akiwa na uweza na mamlaka kama Baba yake. Katika mashauri ya Mungu, Kristo alishiriki, ambapo Lusifa hakuruhusiwa kwa sababu hiyo kuingia katika makusudi ya Mungu. "Kwa nini," akauliza malaika huyu mwenye uwezo mwingi, "Kristo awe mkuu kuliko wote? Kwa nini anaheshimiwa zaidi kuliko Lusifa?"

KUTORIDHIKA MIONGONI MWA MALAIKA

Akiondoka mahali pake mbele za Mungu, Lusifa akatoka kwenda kueneza roho ya kutoridhika miongoni mwa malaika. Akifanya kazi yake kwa siri kubwa, na kwa kitambo kuficha kusudi lake hasa chini ya mwonekano wa heshima kuu kwa Mungu, akajitahidi kuchochea hali ya kutoridhika juu ya sheria zilizovitawala viumbe vya mbinguni, akatangaza kwamba ziliweka vizio visivyokuwa vya lazima. Kwa vile tabia zao zilikuwa takatifu, akasisitiza kwamba malaika wangepaswa kuyatii mapenzi ya nia zao. Akajaribu kuwavuta wapate kushirikiana naye kwa kuwaeleza kwamba Mungu alikuwa hajamtendea yeye kwa haki kwa kumpa Kristo heshima kubwa sana. Alidai kwamba kule kutaka kwake uwezo mkubwa zaidi na heshima alikuwa hana lengo la kujiinua nafsi yake, bali alikuwa anatafuta njia ya kuwapatia uhuru wakazi wote wa mbinguni, na kwamba kwa njia hii wangeweza kuifikia hali ya juu zaidi ya maisha.

REHEMA KUU ZA MUNGU

Mungu kwa rehema zake nyingi alimvumilia Lusifa kwa muda mrefu. Hakumtelemsha cheo chake mara moja, wala hakufanya hivyo hata wakati ule [Lusifa] alipoanza kutoa madai yake ya uongo mbele ya malaika wale watiifu. Aliachwa na kubaki mbinguni kwa muda mrefu. Tena na tena alipewa msamaha kwa sharti la kutubu na kunyenyekea.

Juhudi kama hizo kutoka kwake aliye na upendo wa milele na hekima isiyokuwa na kikomo zilikusudiwa kwa ajili ya kumthibitishia [Lusifa] kosa lake. Roho hii ya kutoridhika ilikuwa haijapata kujulikana kamwe mbinguni. Mwanzoni Lusifa mwenyewe hakujua alikuwa anaelekea wapi; hakuelewa kiini halisi cha hisia zake. Lakini kule kutoridhika kwake kulipothibitika kuwa hakukuwa na msingi wo wote, Lusifa akasadiki ya kwamba alikuwa amekosa, ya kwamba madai ya Mungu yalikuwa ya haki, na ya kwamba ilimpasa yeye kuyakubali kuwa ndivyo yalivyo mbele ya mbingu yote. Laiti angalifanya hivyo, angekuwa amejiokea mwenyewe pamoja na malaika wengi. Wakati huu alikuwa bado hajautupilia mbali utii wake kwa Mungu. Japo alikuwa amekiacha cheo chake kama Kerubi Afunikaye, hata hivyo kama angetaka kumrudia Mungu, akiitambua hekima ya Muumbaji wake, na kutosheka kukalia nafasi aliyopewa katika mpango mkuu wa Mungu, angekuwa amerejeshwa katika cheo chake. Lakini kiburi chake kilimzuia kunyenyekea. Akaendelea tu kuitetea njia yake, akisema kwamba hana haja yo yote ya kutubu, naye akajitoa kikamilifu kulianzisha pambano lile kuu dhidi ya Muumbaji wake.

Nguvu zake zote za akili sasa zikaelekezwa katika kufanya udanganyifu, kuwashawishi malaika wale waliokuwa chini ya uongozi wake ili wapate kushirikiana naye. Hata ukweli ule wa kwamba Kristo alikuwa amemwonya na kumshauri ulipotoshwa ili kutimiza hila zake za uhaini. Kwa [malaika] wale waliofungwa kwa upendo wao kumtegemea yeye, Shetani aliwaeleza kwamba alikuwa amehukumiwa pasipo kufuata haki, kwamba cheo chake hakikupewa heshima inayostahili, na ya kwamba uhuru wake utapunguzwa. Kutoka katika [mbinu yake ya] kuyaeleza vibaya maneno ya Kristo akaingia katika uongo na uongo wa moja kwa moja, akimshutumu Mwana wa Mungu kwamba ana hila ya kumwadhibi mbele ya wakazi wote wa mbinguni. Pia alitafuta njia ya kuleta hoja ya uongo kati yake na malaika wale watiifu. Wale wote ambao alishindwa kuwageuza na kuwaleta upande wake kabisa akawashutumu kwamba hawajali hali njema ya viumbe wote wa mbinguni. Mambo yale yale aliyokuwa anayafanya mwenyewe, lawama yake akawatupia malaika wale waliodumu kuwa waaminifu kwa Mungu. Kisha akayaendeleza mashtaka yake juu ya Mungu kwamba hana haki, akaanza kueleza kwa ubaya maneno na matendo ya Muumbaji wake. Ulikuwa ni mpango wake kuwachanganya mawazo malaika wale kwa hoja zake za chini chini kuhusu makusudi ya Mungu. Kila jambo lililokuwa la kawaida akalifunika kwa usiri, na kwa hila yake potofu akatia mashaka juu ya semi zilizo wazi kabisa za Yehova. Cheo chake kikubwa, kilichomweka karibu sana na utawala wa Mungu, kilimpa nguvu nyingi sana kwa maneno aliyosema, na wengi wakashawishika kujiunga naye katika maasi dhidi ya mamlaka ya Mungu.

UDANGANYIFU WA SHETANI

Katika hekima yake Mungu alimruhusu [alimwacha] Shetani kuendeleza kazi yake, mpaka hapo roho ya chuki itakapokomaa na kuzaa maasi hai. Lilikuwa ni jambo la

lazima kwa mipango yake [Shetani] kukamilika, ili tabia yake halisi na mwelekeo wake upate kuonwa na wote. Lusifa, kama malaika aliyetiwa mafuta, alikuwa ametukuzwa sana; alipendwa sana na viumbe [vyote] vya mbinguni, na mvuto wake juu yao ulikuwa na nguvu. Serikali ya Mungu haikuwajumuisha tu wakazi wote wa mbinguni, bali wa malimwengu yote aliyokuwa ameyaumba; na Shetani akadhani kwamba kama angewachukua malaika wote wa mbinguni katika maasi hayo, basi, angeweza pia kuyachukua malimwengu yale mengine. Kwa hila akatoa maelezo ya msimamo wake katika suala lile, akitumia werevu na udanganyifu kutekeleza malengo yake. Uwezo wake wa kudanganya ulikuwa mkubwa sana, na kujificha katika vazi la udanganyifu alijipatia faida. Hata malaika wale waliokuwa waaminifu hawakuweza kabisa kuitambua tabia yake au kuona kazi yake ilikuwa inaelekea kuleta matokeo gani.

Shetani alikuwa amepata heshima kubwa sana, na matendo yake yote yalikuwa na usiri, hata ikawa vigumu [kwa Mungu] kuwafunulia malaika wale hali halisi ya kazi yake. Mpaka itakapofikia ukamilifu wake, dhambi isingalionekana kuwa ni kitu kibaya kama ilivyo. Mpaka wakati huo ilikuwa haina nafasi yo yote katika malimwengu ya Mungu, na viumbe wale watakatifu hawakuwa na dhana yo yote ya hali yake halisi na ubaya wake. Hawakuweza kutambua matokeo yatakayotokea kwa kitendo cha kuiweka kando Sheria ya Mungu [Amri Kumi]. Mwanzoni Shetani alikuwa ameificha kazi yake kwa maungamo ya juu juu tu kwamba alikuwa mtiifu kwa Mungu. Alidai kwamba alikuwa anatafuta njia ya kuikuza heshima ya Mungu, uthabiti wa Serikali yake, na manufaa ya wakazi wote wa mbinguni. Wakati anaendelea kuchochea hali ya kutoridhika mioyoni mwa malaika waliokuwa chini yake, kwa hila alikuwa amefanya ionekane kwamba alikuwa anatafuta kuiondoa hali hiyo ya kutoridhika. Aliposisitiza kwamba mabadiliko yafanyike katika taratibu na Sheria za Serikali ya Mungu [Amri Kumi], alikuwa na kisingizio kwamba hayo yalikuwa ya lazima ili kuhifadhi amani mbinguni.

Katika kushughulika kwake na dhambi, Mungu angeweza kutumia tu haki na kweli. Shetani angeweza kutumia kile ambacho Mungu asingeweza kutumia ----- kujipendekeza na udanganyifu. Alikuwa ametafuta njia ya kulifanya Neno la Mungu lionekane kuwa la uongo na kuelezea vibaya mpango wa Serikali Yake [Mungu] mbele ya malaika wale, akidai kwamba Mungu alikuwa hana haki kuwawekea sheria na kanuni wakazi wale wa mbinguni; kwamba katika kuwataka viumbe wake wanyenyekee na kumtii, [Mungu] alikuwa anataka kujiinua Mwenyewe. Kwa hiyo, ikawa ni lazima kudhihirisha mbele ya wakazi wote wa mbinguni, pamoja na wale wa malimwengu mengine, kwamba Serikali ya Mungu ilikuwa ya haki, Sheria yake [Amri Kumi] ilikuwa kamilifu. Shetani alikuwa amefanya ionekane kwamba yeye alikuwa anatafuta kuendeleza manufaa ya ulimwengu mzima. Tabia halisi ya tapeli huyo [wa ufalme], makusudi yake hasa, wote walipaswa kuyajua. Hana budi kupewa muda wa kujidhihirisha mwenyewe kwa matendo yake maovu.

TAPELI AFICHULIWA

Fitina iliyosababishwa na mwenendo wake mwenyewe kule mbinguni, Shetani akailaumu Sheria na Serikali ya Mungu [kuwa ndicho chanzo chake]. Akatangaza kwamba maovu yote yalikuwa ni matokeo ya utawala wa Mungu. Akadai kwamba lilikuwa ni lengo lake yeye kuziboresha sheria za Yehova. Kwa ajili hiyo, ilikuwa ni lazima kwamba apewe nafasi ya kuonyesha sura ya madai yake, na kuonyesha utendaji wa mabadiliko yake aliyokuwa amependekeza kufanyika katika sheria ile ya Mungu. Kazi yake mwenyewe haina budi kumhukumu. Tangu mwanzo Shetani alikuwa amedai kwamba alikuwa hajafanya maasi yo yote. Ulimwengu wote unapaswa kumwona tapeli huyo akifichuliwa.

Hata ilipoamuliwa kwamba asingeweza kuendelea tena kuishi mbinguni, Mungu mwenye hekima hakumharibu Shetani. Kwa vile ni huduma ya upendo tu inayokubaliwa na Mungu, utiifu wa viumbe vyake vyote unapaswa kutegemea juu ya kutambua haki yake na fadhili zake. Wakazi wa mbinguni na malimwengu mengine, wakiwa hawajawa tayari kuelewa tabia au matokeo ya dhambi, wakati ule wasingeweza kuona haki na rehema ya Mungu katika kumwangamiza Shetani. Kama angefutuliwa mbali papo hapo, basi, wangekuwa wanamtumikia Mungu kwa hofu kuliko kwa upendo. Mvuto wa tapeli huyo usingeweza kufutika kabisa. Uovu hauna budi kuachwa mpaka ukomae. Kwa manufaa ya malimwengu yote kwa vizazi visivyokuwa na mwisho, Shetani hana budi kuzidhihirisha kikamilifu kanuni zake, ili shutuma zake dhidi ya Serikali ya Mungu zionekane katika nuru yake halisi kwa viumbe vyake vyote, ili haki na rehema ya Mungu na Sheria yake isiyobadilika kamwe [Amri Kumi] viwekwe mbali na hoja yo yote milele.

Maasi haya ya Shetani yalipaswa kuwa fundisho kwa malimwengu yote kwa vizazi vyote vijavyo, ni ushuhuda wa kudumu wa tabia na matokeo ya kutisha ya dhambi. Utendaji wa utawala wa Shetani, matokeo yake juu ya wanadamu na malaika, ungeonyesha matokeo yatakavyokuwa kwa kuyaweka kando mamlaka ya Mungu. Ungeshuhudia kwamba kule kuwako kwa Serikali ya Mungu na Sheria yake [Amri Kumi] kumefungamana na usitawi wa viumbe vyote alivyoviumba. Kwa njia hiyo, historia ya jaribio hilo la kutisha la maasi lingekuwa kinga ya milele kwa viumbe vyote vitakatifu vyenye akili, ili kuvizua visipate kudanganywa [tena] kuhusu hali halisi ya uvunjaji huo [wa sheria], kuwaokoa wasitende dhambi na kupatwa na mateso ya adhabu zake.

DHARAU KWA SHERIA YA MUUMBAJI

Mpaka mwisho kabisa wa pambano hili kule mbinguni, tapeli yule mkuu aliendelea kujihesabia haki mwenyewe. Iipotangazwa kwamba yeye pamoja na washirika wake wote ni lazima wafukuzwe kutoka kwenye makao yale yenye raha, ndipo kiongozi huyo wa maasi alipotoa tamko lake la wazi kwa ujasiri na kuidharau Sheria ya Muumbaji [Amri Kumi]. Akarudia tena madai yake kwamba malaika hawakuwa na haja yo yote ya

kutawaliwa, bali wangeachwa kufuata mapenzi yao wenyewe, ambayo daima yangewaongoza vizuri. Akazishutumumu Amri za Mungu [Kumi] kuwa zilikuwa kizuizi cha uhuru wao na kutangaza kwamba lilikuwa ni kusudi lake kupata kibali cha kuifutilia mbali sheria hiyo; kwamba, wakiisha kuwekwa huru mbali na kizuio hicho, basi, majeshi yote ya mbinguni yangeingia katika hali ya juu zaidi, na ya utukufu zaidi ya maisha yao.

Kwa kauli moja, Shetani na majeshi yake wakamtupia Kristo lawama yote kwa maasi yale, wakitangaza kwamba kama wasingekaripiwa, basi, wasingeweza kamwe kufanya maasi yale. Wakawa sugu na tayari kupigana vita kwa utovu wa utii wao, bure wakatafuta kuipindua Serikali ya Mungu, lakini kwa wakati uo huo wakadai kwa makufuru ya kwamba wao wenyewe ni wahanga wasiokuwa na hatia yo yote wa mamlaka hiyo ya ukandamizaji. Mwasi Mkuu pamoja na wale wote walioshirikiana naye hatimaye wakafukuziliwa mbali kutoka mbinguni.

Roho [Pepo] yule yule aliyechochea maasi mbinguni bado anachochea maasi duniani. Shetani ameendelea kushughulika na wanadamu kwa kutumia hila yake ile ile aliyoitumia kwa malaika wale. Roho yake sasa inatawala ndani ya wana wa kuasi. Kama yeye wanatafuta kuvivunjilia mbali vizio vya Sheria ya Mungu [Amri Kumi], tena wanawaahidia watu uhuru kwa njia ya kuzivunja amri zake [kumi]. Karipio la dhambi kwao bado linaamsha roho ile ya chuki na upinzani. Ujumbe wa Mungu wa maonyo unapoletwa kwao na kugusa dhamiri zao, Shetani anawaongoza watu hao kujihesabia haki wenyewe na kutafuta wengine wa kuwaunga mkono katika njia yao ya dhambi. Badala ya kuyarekebisha makosa yao, wanachochea chuki kali dhidi ya mkemeaji, kana kwamba yeye ndiye aliyekuwa chimbuko la pekee la tatizo lao. Tangu siku zile za Habili mwenye haki mpaka siku hizi zetu hiyo ndiyo roho iliyokwisha kuonyeshwa kwa wale wanaothubutu kuihukumu dhambi.

Kwa kuieleza vibaya tabia ya Mungu kama vile alivyofanya mbinguni, akimfanya afikiriwe kuwa ni mkali na dhalimu, Shetani alimshawishi mwanadamu kutenda dhambi. Na baada ya kufanikiwa mpaka hapo, akatangaza kwamba vizio vya Mungu visivyokuwa vya haki ndivyo vilivyomfanya mwanadamu kuanguka dhambini, kama vile vilivyomfanya yeye mwenyewe kuanguka katika maasi.

Lakini yule Aliye wa Milele yeye mwenyewe anaitangaza tabia yake hivi: "BWANA, BWANA, Mungu mwingi wa huruma, mwenye fadhili, si mwepesi wa hasira, mwingi wa rehema na kweli; mwenye kuwaonea huruma watu elfu elfu, mwenye kusamehe uovu na makosa na dhambi; wala si mwenye kumhesabia mtu mwovu kuwa hana hatia kamwe." Kutoka 34:6,7.

Katika kitendo cha kumfukuza Shetani kutoka mbinguni, Mungu alitangaza haki yake na kutunza heshima ya kiti chake cha enzi. Lakini mwanadamu alipokosa kwa kuyakubali madanganyo ya roho [pepo] huyo aliyeasi, Mungu alitoa ushahidi wa UPENDO WAKE KWA KUMTOA MWANAWA PEKEE kufa kwa ajili ya wanadamu walioanguka [dhambini]. Katika upatanisho huu tabia ya Mungu imedhihirika. Hoja yenye nguvu ya msalaba hudhihirisha kwa ulimwengu wote kwamba njia ya dhambi ambayo Lusifa aliichagua kwa vyo vyote vile Serikali ya Mungu isingeweza kutupiwa lawama yo yote.

Katika pambano lile kati ya Kristo na Shetani, wakati wa kazi ya Mwokozi duniani, tabia ya tapeli huyo mkuu ilifichuliwa. Hakuna kitu cho chote ambacho kingeweza kumng'oa Shetani kutoka katika upendo [waliokuwa nao kwake] malaika wale wa mbinguni pamoja na wale wa malimwengu yote matiifu kama lilivyofanya pambano lile la kikatili dhidi ya Mkombozi wa ulimwengu. Ujasiri wa madai yake yenye makufuru kwamba Kristo angemsujudu yeye, ujasiri wake uliojaa kiburi wa kumchukua mpaka juu ya kilele cha mlima mrefu mno na juu ya kinara cha hekalu, kusudi lake ovu likajidhihirisha kwa kumshurutisha ajitupe chini kutoka umbali ule unaotia kizunguzungu, uovu wake usiolala usingizi uliomwinda toka mahali hadi mahali, ukiichochea mioyo ya makuhani na watu kulikataa pendo lake, na mwishowe kupiga kelele, "Msulibishse! Msulibishse!" ----- mambo hayo yote yaliyamsha mshangao mkuu na hasira ya malimwengu [yote].

Alikuwa ni Shetani aliyeuchochea ulimwengu kumkataa Kristo. Mkuu huyo wa uovu alitumia uwezo wake wote na hila kumwamamiza Yesu; kwa maana aliona kwamba rehema na upendo wa Mwokozi, huruma yake na upole, vilikuwa vinaidhihirisha tabia ya Mungu mbele ya ulimwengu huu. Shetani alipinga kila dai alilotoa Mwana wa Mungu na kuwatumia watu kama mawakala wake ili kuyajaza maisha ya Mwokozi huyu na mateso na huzuni. Udanganyifu na uongo ambao alikuwa ametafuta ili kuizuia kazi ya Yesu, chuki ile iliyoonyeshwa kwake kupitia kwa wana wale wa kuasi, mashtaka yale ya kikatili dhidi Yake [Kristo] ambaye maisha yake yalikuwa mema yasiyo na kifani, yote hayo yalitokana na roho yake [Shetani] ya kulipiza kisasi. Moto wa wivu wake na uovu pamoja na chuki yake na kisasi, ukalipuka pale Kalvari dhidi ya Mwana wa Mungu, wakati mbingu yote imeangaza macho yake kuliangalia tukio lile kwa hofu kuu na kimya.

. Kafara ile kuu ilipokwisha kutolewa, Kristo alipaa juu, akikataa kupokea ibada ya malaika mpaka hapo atakapolitua ombi hili: "Baba, hao ulionipa nataka wawe pamoja nami po pote nilipo." Yohana 17:24. Ndipo kwa upendo usioelezeka na kwa nguvu jibu likaja kutoka kwenye kiti cha enzi cha Baba: "Na wamsujudu malaika wote wa Mungu." Waebrania 1:6. Hapakuwa na waa lo lote juu ya Yesu. Kujinyenyekeza kwake kukakoma, kafara yake ikakamilika, akapewa jina lile lipitalo kila jina.

Basi hatia ya Shetani ikajitokeza bila kuwapo na udhuru wo wote. Alikuwa ameidhihirisha tabia yake halisi kama mwongo na mwuaji. Ikaonekana ya kwamba kwa roho ile ile aliyowatawala wana wa wanadamu, ambao walikuwa dhini ya mamlaka yake, angekuwa ameidhihirisha endapo angekuwa ameruhusiwa kuwatawala wakazi wa mbinguni. Alikuwa amedai kwamba uvunjaji wa Sheria ya Mungu [Amri Kumi] ungeleta uhuru na utukufu; lakini ukaonekana kuleta matokeo ya utumwa na hali mbaya.

Mashtaka ya uongo ya Shetani dhidi ya tabia ya Mungu na Serikali yake yakaonekana katika nuru yake halisi. Alikuwa amemshtaki Mungu kuwa anatafuta tu kujiinua mwenyewe kwa kutaka unyenyekevu na utii kutoka kwa viumbe vyake, naye alikuwa ametangaza kwamba, wakati Muumbaji anawaamuru wengine wote kujikana nafsi, Yeye hajizoezi kujikana nafsi yake wala kujitoa mhanga. Basi ikaonekana kwamba Mtawala huyo wa ulimwengu alikuwa ametoa kafara kubwa sana ambayo ni upendo peke yake uheweza kutoa kwa ajili ya wokovu wa wanadamu walioanguka, yaani, wenye dhambi;

kwa maana "Mungu alikuwa ndani ya Kristo, akiupatanisha ulimwengu na nafsi yake." 2 Wakorintho 5:19. Pia ilionekana kwamba, wakati Lusifa alipokuwa amefungua mlango na kuiingiza dhambi kwa tamaa yake ya kupata heshima na uwezo mkuu wa kutawala, Kristo, ili kuiharibu dhambi, alikuwa amejinyenyekeza mwenyewe na kuwa mtii hata mauti [ya msalaba].

HOJA KWA AJILI YA MWANADAMU

Mungu alikuwa amedhihirisha chuki yake juu ya kanuni zile za uasi. Mbingu yote ikaiona haki yake ikifunuliwa kwa kumhukumu Shetani na kumkomboa mwanadamu. Lusifa alikuwa ametangaza kwamba kama Sheria ya Mungu [Amri Kumi] ilikuwa haibadiliki, basi, na adhabu yake isingeweza kuondolewa, kila mvunja sheria angepaswa kuzuiwa milele asipate upendeleo wo wote wa Muumbaji. Alikuwa ametoa madai yake kwamba taifa lile la wanadamu lililokuwa limetenda dhambi lilikuwa limekwenda mbali na lisingeweza kukombolewa, na kwa sababu hiyo walikuwa mateka wake halali. Walakini kifo chake Kristo kilikuwa ni hoja iliyotolewa kwa ajili ya mwanadamu ambayo isingeweza kupinduliwa. Adhabu ya Sheria ile ilimwangukia yeye aliyekuwa sawa na Mungu, na mwanadamu akawa huru kuipokea haki yake na kwa maisha yake ya toba na unyenyekevu kupata ushindi, kama vile Mwana wa Mungu alivyopata ushindi juu ya nguvu ya Shetani. Hivyo Mungu ni mwenye haki na mwenye kuwahesabia haki wote wanaomwamini Yesu.

Lakini haikuwa tu kwa ajili ya kujipatia ukombozi wa mwanadamu kwamba Kristo alikuja duniani humu kuteseka na kufa. Alikuwa ili "kuitukuza Sheria [Amri Kumi]" na "kuiadhimisha." Sio tu kwamba wakazi wa ulimwengu huu wapate kuiangalia sheria yake ipasavyo, bali ilikuwa kwa ajili ya kuonyesha kwa dunia zote za malimwengu kwamba Sheria ya Mungu HAIBADILIKI. Endapo madai yake yangeweza kuwekwa kando, basi, Mwana wa Mungu naye asingepaswa kuutoa uhai wake ili kufanya upatanisho kwa ajili ya uvunjaji wake [Sheria hiyo]. Kifo cha Yesu kinathibitisha kwamba [Sheria] haibadiliki kamwe. Na kafara ile ambayo upendo wa milele ulimsukuma Baba na Mwana kuitoa, ili wenye dhambi wapate kukombolewa, inadhihirisha kwa malimwengu yote ----- kwamba kitu cho chote pungufu kuliko mpango huo wa upatanisho kisingeweza kutosheleza ----- kwamba haki na rehema ndio msingi wa Sheria na Serikali ya Mungu.

Katika utekelezaji wa mwisho wa hukumu itaonekana kwamba hapakuwa na sababu yo yote kwa dhambi kuwako. Wakati yule Jaji wa dunia yote atakapomwuliza Shetani, "Kwa nini wewe umeniasi Mimi, na kuninyang'anya raia hao wa ufalme Wangu?" mwasisi huyu wa dhambi hataweza kutoa udhuru wo wote. Kila kinywa kitafumbwa, na majeshi yote ya uasi yatatekewa.

Msalaba wa Kalvari, wakati unatangaza kwamba SHERIA HAIBADILIKI, unatangaza kwa ulimwengu kwamba MSHAHARA WA DHAMBI NI MAUTI. Katika kilio cha mwisho cha Mwokozi, alicholia, akisema, "IMEKWISHA," kengele ya kifo cha Shetani iligongwa. Pambano kuu lililokuwa limeendelea sana wakati huo likaamuliwa, na hatua ya mwisho ya kuzifutulia mbali dhambi likathibitishwa. Mwana wa Mungu alipitia malango yale ya kaburi, ili "kwa njia ya mauti AMHARIBU yeye aliyekuwa na nguvu za mauti, yaani, IBILISI." Waebrania 2:14. Tamaa ya Lusifa ya kujiinua mwenyewe ilikuwa imemwongoza kusema: "Nitakiinua kiti changu juu kuliko nyota za Mungu;... Nitafanana na Yeye Aliye juu." Mungu anatangaza hivi: "Nami ni[ta]kufanya kuwa majivu juu ya nchi,... wala HUTAKUWAPO TENA HATA MILELE." Isaya 14:13,14; Ezekieli 28:18,19. Hivyo "siku ile inakuja, inawaka kama tanuru; na watu wote wenye kiburi, nao wote watendao uovu, watakuwa makapi; na siku ile inayokuja ITAWATEKETEZA, asema BWANA wa majeshi; hata haitawaachia SHINA wala TAWI." Malaki 4:1.

Malimwengu yote yatakuwa yameshuhudia tabia na matokeo ya dhambi. Na kule kufutuliwa mbali kabisa kwa [dhambi], ambako mwanzoni kungekuwa kumewaletea hofu malaika wale na kumvunjia heshima yake Mungu, sasa kutathibitisha haki ya upendo wake na kuimarisha heshima yake mbele ya malimwengu yote ya viumbe vyake wanaofurahia kuyafanya mapenzi yake, na ambao mioyoni mwao imo Sheria yake [Amri Kumi]. Kamwe dhambi haitaonekana tena. Lasema Neno la Mungu, "Mateso hayatainuka mara ya pili." Nahumu 1:9. Sheria ya Mungu [Amri Kumi], ambayo Shetani ameishutumu kuwa ni kongwa la utumwa, itaheshimiwa kama SHERIA YA UHURU. Viumbe waliojaribiwa na kuthibitishwa hawataweza kamwe kugeuka tena na kuacha utii wao kwake yeye ambaye tabia yake imedhihirishwa kikamilifu mbele yao kuwa ni ya UPENDO wenye kina kisichopimika na hekima isiyochunguzika.

----- E.G. White, THE TRIUMPH OF GOD'S LOVE, uk.291-297.

"Why were sin and suffering permitted?"

OR, THE GREAT CONTROVERSY, Sura ya 29, uk. 492-504.

"The Origin of Evil."

Kwa habari zaidi tafadhali tuandikie:

Leaves of Life – International
S.L.P. 17
Mafinga Iringa Tanzania